



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Taküm December tashi nung
ajak nem vaccine agütsütsü

Syria tir kümsük pezübuba atema
al-Assad maneni shimtetogo

VOL. XVIII NO. 224 (ADOK 224) DIMAPUR

KÜPTOKNÜ (SATURDAY)

MONUPII (MAY) 29, 2021

₹ 5.00

COVID-19 Nagaland: Nisung 192 dak putet & 5 asü

Kohima, May 28, 2021 (TYO): Honibarnü Nagaland nung nisung 192 dak COVID-19 putetba züngsema nisung ajak agi 21,215 kümogo, ta Health & Family Welfare Minister, S Pangnyu Phom-i ashi.

"Tanü nisung 192 dak COVID-19 putet. Parnokji Dimapur nung 61, Tuensang nung 47, Kohima nung 26, Phek nung 25, Zunheboto nung 14, Peren nung 5, Wokha o Mokokchung nung pezüzü (4), Longleng nung 3, Kiphire nung 2 aser Mon nung 1 lir" ta Minister Pangnyu-i metetdaksü.

"Maneni, tanü nisung 134 taneptsü angu. Parnokji Dimapur nung 65, Kohima nung 38, Mokokchung nung 11, Phek nung 9, Peren nung 7 aser Zunheboto nung 4 lir" ta paisa ashi.

Nisung 21,215 rongnungi 15,258 taneptsü nguogo aser tang nisung 4,990 anepaludar. Nagaland nung COVID-19 nungi taneptsü angur 71.92% lir, ta Minister Pangnyu-i metetdaksü. Honibarnü COVID-19 puteta

alir nisung 5 asüba züngsema tasür ajak agi 343 klümogo, ajisüaka nisung 12 bo tanga tashidak ajanga asü, ta paisa ashi.

Nagaland nung COVID-19 alitsü akok ta temolung melemi bilemba sample 1,88,446 tendangogo. RT-PCR ajanga sample 88,597, TrueNat ajanga 54,628 aser Rapid Antigen Test ajanga 45,221 tendang, ta ketdangsür kati ashi.

"Brihostibar tashi nung nisung 2,13,537 nem COVID-19 vaccine indang dose 2,67,638 agütsüogo" ta State Immunization Officer Dr Ritu Thurr-ia metetdaksü.

Vaccine agirtemji frontline workers 57,894, healthcare workers 15,450, arishi küm 45 ser temapur 1,21,596 aser arishi küm 18 nungi 44 tsüngda alir 18,597 lir, ta paisa ashi.

"Nisung 54,101-i vaccine indang dose anaprong agiogo. Parnokji frontline workers 27,951, healthcare workers 10,179 aser arishi küm 45 ser temapur 15,971 lir," ta Dr Thurr-isa metetdaksü.

COVID mozü Rs 990 agi ayoktsü

New Delhi, May 28, 2021 (Agencies): Defense Research and Development Organization (DRDO)-i COVID-19 agi shirangertem anepalutsü atema yangluba 2DG drug sachet ka nung Rs 990 agi ayoktsü.

Iba mozü ya Dr Reddy's Lab ajanga ayoktsü aser Centre o state sorkar mozü kitem dang jenjang ajemer ayoktsü.

May 27, 2021 nungi iba mozü indang sachets 10,000 ayok tenzüksü, ta taoba mapang Union Defence Minister Rajnath

Singh-i metetdakja liasü.

Mozü mezüngbuba shilemji AIIMS, Armed Forces Hospitals aser DRDO hospitals nung dang angutsü aser June ita nungi tanga mozü kitem nung angutsü.

DRDO-i yangluba COVID indang mozü ya powder form nung angur aser tzü nung meyokteper ajemer.

Iba mozü ya virus aliba cells nung bendentsü aser virus ainba noktangtsü, ta DRDO-i metetdaksüogo.

Nagaland nung COVID-19 atema Expert Panel shimogo

Dimapur, May 28, 2021 (TYO): Nagaland nung COVID-19 wara tanabuba agi kanga mejungi kongshiba atema state sorkari May 13, 2021 nü advisory panel of experts shimogo.

Iba telok yagi State Disaster Management Authority (SDMA) aser State Executive Committee (SEC) Nagaland nem COVID-19 dak sendakba shisatsü agütsütsü, ta Advisor Mmholnomo Kikon-i ashi.

Iba telok nung züngsem mongintemji- Molecular Immunology, Drug Development to fight Corona from University Hospital, Magdeburg Germany, Senior Scientist Dr Satish Ranjan;

Emergency Response Chemical and Biological Warfare, CROPC - MoES New Delhi nungi Col Sanjay Srivastava aser National Institute of Epidemiology, New Delhi Director Dr Manoj Murhekar nungertem lir.

"Nagaland nung Health & Family Welfare Department lenisüba kübok wara anema mapa inyaka arur. Sorkari parnok tashimait ta asürba masü saka COVID-19 wara tanabuba agi kanga mejungi kongshiba den ano shilem tasembuba agi atongtsü ta asüba nung ajemdaker mongin nisungtem teyari agitsü telemteba agi" ta Advisor Kikon-isa ashi.



Dimapur Ao Baptist Arogo (DABA) ajanga tang Covid tashidak wara tesashi agi shirangertem asoshi sarasadem shiti ka den temang tashi aitsü chiyongtsü tajung enoker talep kaka Dimapur nung aliba Covid Hospital shia nung Covid agi shirangertem nem tanü Hokolbar nü lema agütsüba noksa nung angur. Iba mapa yabo DABA kübok aliba tamanger kibongtemi mejetteta tenla balaka agütsüba nungi inyaka liasü. Ano, DABA-isa Covid mozü kitem nung oxygen cylinder agütsütsü renemdagi. Dimapur nung arogotem dak alaka ano ASTD ama lokti tentet balalai pei pei akok jurila Covid tongpang nung shilem tajung agidagi aser ano ajak tenüng nung longjemer Dimapur Area Ao Baptist Churches & Civil Societies Co-ordination Committee ajanga yaküm nungi maneni iba tongpang nung shilem agidagi. (Dimapur, May 28, 2021).

Nagaland nung Total Lockdown June 11, 2021 tashi atsülanger

Kohima, May 28, 2021 (TYO): Nagaland nung COVID-19 menatepba 10% teküpok aludaksütsü nukjidong nung High Powered Committee (HPC) on COVID-19-i June 11, 2021 tashi total lockdown atsülangtsü telemteba agiogo.

State sorkari May 14 nungi hopta ka atema total lockdown alitsü metetdaksü saka ibaji May 31 tashi atsülangba sülen tan agi tasemben atema mapang atsülangogo.

Honibarnü Chief Minister Neiphu Rio menden ser High Powered Committee (HPC)

senden amendang iba telemteba Kronu-i metetdaksü.

"Tanü State Civil Secretariat nung senden amendang Health & Family Welfare department-i powerpoint presentation ajanga Nagaland nung COVID-19 dak sendakba osangtem lemsatep" ta COVID-19 atema Government spokespersons, Minister Neiba Kronu aser Advisor Mmholnomo Kikon nati ashi.

"Department-i clinical aser epidemiological criteria nung aliba ama virus indang incubation period hopta anabosa tembangtsüla ashi" ta Minister

Kronu-i metetdaksü.

"Medical tsütsü nungi tebilemba ashiba aser Nagaland nung nisung aika dak COVID-19 putetba den ano District Task Force (DTF) balala nungi osangtem metetpelaba sülen HPC-i June 11, 2021 tashi total lockdown atsülangtsü lemtet" ta paisa ashi.

"Department-i positivity rate 10% kübok ajemdaksütsü atema total lockdown atsülangtsü shidanga liasü" ta Health & Family Welfare, Deputy Director, Dr Nyanthung Kikon-i ashi.

(Maneni tapak 2 nung...)

MLA Rupjyoti Kurmi-i arrtsülen tensa raksatsü: UNTABA

Dimapur, May 28, 2021 (TYO): Assam nung news agency temi Assam aser Nagaland tsüngda arrtsü mangatettep adokba osangtem tiyazü prokshir ta United Naga Tribes Association on Border Areas (UNTABA)-i metetdaksüogo.

"MLA Rupjyoti Kurmi-i tashiyim mapa inyakba jungjunga bushisüngdangtsü takhangba agütsür aser tarutsü nung ibala tensa majurutsü atema merenshütsüla. Nagaland sorkari state ana tsüngda 'Interim Agreement' of 1979 meyipa reprangshitsü atema mapa

inyaktsü akhanger" ta UNTABA Chairman Hukavi T Yeputhomi aser General Secretary Imsumongba Pongen nati sangdong ka nung metetdaksü.

Iba ya kecha agia masü saka Mariani MLA, Rupjyoti Kurmi-i asüküma arrtsü adener kilometer 3 tema Nagaland telungi aitba aser Vikuto Village lushi tonga aruba ajanga atalok, ta UNTABA-i ashi.

Rupjyoti Kurmi-i Vikuto yimdaklirtem alu mapa meinyakdaksü aser kozü alu den tanga aonsotem raksatsü. Paisa yimdaklirtem amokmeren aser o

tamajung shia merenshi. Iba tashiyim mapa anema yimdaklirtemi ola adokdang MLA-i anir aruba Assam Police aser PSO nungertemi injang khatok. Iba jagi yimdaklirtemi muzzle-loading prangpong ka nungi injang ana khatok, ta UNTABA-isa ashi.

Rupjyoti Kurmi-i arrtsülen iba ama tensa adokdaksüba ya tang mezüng masü. Pai state ana nung arrtsülen alirtem tsüngda mepemesü adokdaksütsü atema ajungmesoa arur, ta parnokisa metetdaksü.

(Maneni tapak 2 nung...)

Covid-19 tashidak nokdangtsü atema senso shia teinyaktsü asem :

Tangar alidak teti teni
tebang nembang mask
temerük agiang;



Tangar den tsüktepa
tenokdak aser temen;



Teti sapon agi
teka metsükang.



Tir Yimiyim

BJP National VP Dr. Chuba Ao-i ICH nem oxygen concentrator agütsü



BJP National Vice-President Dr. Chuba Ao (abelen nungi tanabuba) den dangartem Impur Christian Hospital nung May 28, 2021 nü oxygen concentrator ka tenla agütsür yangokba noksa ka yangi angur.

Dimapur, Monupii/May 28 (TYO): BJP National Vice-President Dr. M. Chuba Ao-i tanü (May 28, 2011) Impur Christian Hospital (ICH) semdang aser iba mozüki nung shiranger amshitsü atema oxygen concentrator ka tenla agüja liasü.

ABAM Executive Secretary, Rev. Dr. Mar Pongener lia BJP National vice-president ajanga mozüki ketdangsür nem iba oset agütsüba mapang, pai Impur Christian Hospital atema kanga bilemtsür, ta ashi, koba nija

mozüki ka lir aser nüburttem asoshi mapa tulu inyaker.

Pa molungjang ICH den sendaktepa lir, kechiaser sür alila tetsüa mapang ka Impur Mission Centre nung azüing, ta pai ashi.

Iba oxygen concentrator ya tetsü tenüing nung mozüki nem tenla agütsür, ta ashi aser iba oset yagi mozüki nung nüburttem nüngdakba nung yaritsü imlar, ta ashi.

BJP National Vice-President meina aosang BJP Mokokchung district President,

Imlolemba Jamir-ia, linük lenitsü atema Dr. Chuba Ao shimtetba asoshi BJP National President JP Nadda dang pelar aser pa shimba ajanga Bharatiya Janata Party-i linük nung tesem balala mesüra tamangba yimsü balala nungi süaka kin ajunga tongtipang süa angatetba sayur, ta ashi.

Linük ajunga nungi national vice-president 12 dang shimteta aliba rongnung Dr. Chuba Ao ya ka lir, aser pa shimba ya Naga nunger aser northeast region ajunga asoshi temoatsü lir, ta paisa ashi.

Iba sentong nung BJP Mokokchung District Treasurer, Watiba; BJP ST Morcha Nagaland state executive Limatoshi aser BJP 23 Impur Mandal President, Meyaba nungertema dena liasü.

ICH ketdangsürtemia BJP National Vice-president Dr. Chuba Ao dang pelaba lemsatepa liasü.

BJP National Vice-President Dr. Chuba Ao-i May 12, 2021 nü COVID-19 agi shiranger mozü maliteter nem agütsütsü atema Chief Medical Officer, Mokokchung nem mozü tenla agüja liasü.

Item mozü ya BJP Mokokchung district office ajanga CMO nem amoktsü.

Akhoya nung konger metsütsü training agütsü



Dimapur, Monupii/May 28 (TYO): Agriculture Technology Management Agency (ATMA) Changtongya Block ajanga Mokokchung district kübok Akhoya yimdak Oyster Mushroom (konger tabu ka) tsünütsü atema training agüja liasü, kong Toshirenla, Assistant Technology Manager, Changtongya Block shisalen sayur liasü.

Shishilempadak (market) nung Oyster Mushroom tali sapua akumba aser iba konger achiba ajanga asen temang

nung immune system ajanzükba, high blood pressure ajemdaktsüba, cancer den raratsü tashi agütsür, ta Toshirenla-i iba sentong nung lemsatepa liasü.

Iba training sentong nung technical session aser konger tsünüba nung yimya balala amshiba mapang lemsar agia liasü. Iba sentong nung aluyimer 16 arua shilem agi aser parnok nem Oyster mushroom spawn (metsü) aser danga osettem lema agüja liasü.

CCC Chumukedima atema LBCD ajanga tenla agütsü



Dimapur, Monupii/May 28 (TYO): Chumukedima nung Deputy Commissioner indang office tasenba nung Covid Care Center lapoka alidak COVID-19 agi menepa alir nisung 33 timtem balala ajurua aliba atema Team Dimapur ajanga teyari meshiba nung langzüa, Lotha Baptist Church Diphupar-i District Task Force Dimapur ajanga Covid Care Center Chumukedima atema sen 50,000 tenla agüja liasü.

Iba sen ya Pastor LBCD, Limhathung Lotha-i DPRO Dimapur, Lolano Patton nem amoktsü, shiba District Task Force Dimapur nung züngsem lir.

Dimapur nung COVID-19 dak sendakba inyakyim ketdangsütsü shimteta aliba Nodal Officer, Kikheto Sema, IAS aser Deputy Commissioner & Chairman, District Task Force, Dimapur, Rajesh Soundararajan, IAS tenüing nung DPRO ajanga LBCD dang mapa tajung asoshi pelaba lemsatepa liasü.

Arogo ka nüburttem atsür aruba sabang ka lir, anungji LBCD indang ministerial team ajanga maneni arogopur dang COVID-19 dak sendakba tim yimyatem amshitsü ajungshitsüla, ta Patton-i

ayongzüka liasü.

LBCD yagi Village Level Vigilance Monitoring cell for COVID-19, Diphupar nema senotsü teyari agüja lir. Ajangang masü parnoki arogopur COVID-19 agi kongshir alir aser anogoshi aayanger kibong 70 dak tema nem jang-o-tzü agüja lir.

Sarasadem teyari den külemi arogoi maneni iba timtem mapang nüburttem yaritsü, koba ozü mission wadang nung shilem ka lir, ta LBCD Pastor, Limhathung Lotha-ia ashi.



Nagaland nung, talisa, Covid Hospital nung inyaker Health Worker-temi bendanga aguja shirangertem yariba atema pelaba tamaitso sayua, tanu nungi Dimapur Area Ao Baptist Churches & Civil Societies purtemi Dimapur nung Covid Hospital (govt & private)tem nung inyaker Health Worker-tem ajak nem chiyongtsü agütsü tenzükogo. Tanü tetenzükasa Referral Hospital (CIHSR) nung Pastor N. Lipok Jamiri sarasademer chiyongdaktsüogo. (Dimapur, May 28, 2021)

MLA Rupjyoti Kurmi-i...

(Tapak 1 nungi...)

"Assamaser Nagaland tsüingda arrtsü ken mangatetep ken o ya Supreme Court tsüingdang benoka lir. Anungji MLA Kurmi ama nisungtemi iba tebilemtsü nung tebang aitsü nüngdak madoker. Tanabuba nung arrtsülen tensa azüoktsü atema 'Interim Agreement' of 1979 nung ajemdaker neutral forces (CRPF) mapa lezmükja lir. Anungji nisung shingaia arrtsülen nisungtem ajungmesoa tensa raksatsü temeten mali" ta UNTABA-isa ashi.

"Parnoki onok nguli injang khaloktsü. Ni tia maka asübo taküm samar lila. Sorkari Assam li kümzüka ayutsüla" ta MLA Kurmi-i tiyazü jembiba aitsür aser tarutsü nung pai iba o jembiba atema sasatsü.

Talisa, Assam nung print, electronic aser visual media nisungtemi külen tsütsü dang shir osang prokshiba ya anentsüla mesüra parnok anema okadak ken o benoktsüsa akümtsü, ta UNTABA-isa metetdaksü.

Nagaland nung Total Lockdown...

(Tapak 1 nungi...)

"Nagaland total lockdown tenzükur COVID-19 indang sample positivity rate 34% aliba nungi 21% kümogo aser onoki ibaji 10% kübok aludaktsünür. Ibaji total lockdown ano khen ali nung dang akoktsü" ta Dr Kikon-isa metetdaksü.

"Virus indang incubation period ji anogo ter pezü lir aser iba jagi incubation period anabosa alitsüla" ta paisa ashi.

May 14, 2021 nü Nagaland nung nisung 17,531 dak COVID-19 puteta liasü aser yashi Hokolbar tashi nung iba nung nisung 3,684 bendenlokogo.

"Tesüiba hopta ana tsüingda nisung aika dak COVID-19 puteta arur. Külen, state sorkari tang teinyakdak lockdown inyakyim nung temolung asür aser COVID-19 menatepba azüoktsü atema atsülangtsü nüngdaker" ta Chief Secretary J Alam-ia metetdaksü.

Nagaland nung total lockdown mapang essential services, agriculture aser construction works dak sendakba nisungtem

dak alaka tanüingba nisungtem senzüsönbongtsü memelar.

Tang nüngdakba oset/chiyongtsü ayokba dokantem anepdang 6:00 ako nungi anüngdang 12:00 ako tashi lapoktsü aser kibong nungi nisung kati dang shishii aotsü.

"Total lockdown mapang sorkari taxi & bus drivers aser anogoshi hajira aoertem dena unorganized sectors nem teyari agütsütsü atema HPC-i District Task Force ajak dang nungi osang meshiogo," ta Advisor Kikon-i metetdaksü.

GHC Kohima Bench-i tuyuba reprangshimer:

"May 24, 2021 nü Gauhati High Court, Kohima Bench-i state sorkari nem tetuyuba agütsüba COVID-19 War Room-i agizüka shisadangdar aser iba sülen teinyaktsüteminyaktsü" ta Kikon-isa ashi.

"Common Pool activities atema Local Area Development Programme (LADP) fund nungi 15% agiteta ayuba nungi 10% ji COVID-19 dak sendakba nung

amshitsü tanü HPC-i telemtetba agiogo. DTF temi ashiba ama COVID-19 atema 10% talila lezmüktsütsü. Iba atema Planning department-i sangdong balaka agütsütsü" ta Kronu-isa metetdaksü.

Yimtsüngtem nung virus menatepba azüoktsü atema community surveillance tenzükogo aser DTF dang Village Task Force/Village Disaster Management Authorities akangshitsü tetuyuba agütsüogo, ta paisa ashi.

Nagaland nung vaccine agütsüba mapa tuluba inyaktü atema Village aser Ward/Colony ketdangsürtem dang vaccination atema slots shimtsü mapa lezmüktsütsü, ta Kronu-isa shisem.

"Yaküm COVID-19 wara mezüingbuba atongdang district tem nung COVID-19 maparen ketdangsüa reprangtsü atema mapa lezmüktsüba Minister, Advisor aser opposition MLA temi pei pei district-i ao osang metetpelatsü mepishir" ta HPC-isa metetdaksü.

Tetsür dak tashiyim mapa inyakertem dak police-i injang khaloktsü



Guwahati, May 28, 2021 (Agencies): Bengaluru nung tebur telok kati tetsür ka reshikangshiba aser tashiyim agi shi nung medemba atema nisung 5 pua lir.

Honibarnü parnok 5 rongnungi nisung ana jena aotsü merangba agi police-i tetsüing nung injang khaloktsü.

Honibarnep police-i parnok nisung punguji tetsürla dak tashiyim mapa inyakba tesemi anir ao, saka idangji nisung ana jena aotsü merangba agi police-i injang khaloktsü.

Social media nung video ka prokshiba nung parnoki la kanga reshikangshiba aser teloki tashiyim agi shi nung medem.

Iba ya anogo trok tejaklen Ramamurthy Nagar nung atalok aser social media nung nisungtemi aitsüba den aibelenertem tangsa puang ta takhangba agütsü.

Parnok ya Sagar, Mohemmed Baba Sheikh, Ridoy Babu aser Hakeel ta jangjaogo

saka video nung aliba tetsür ka jena ogo.

"Onoki video clip nung aliba noxsatem aser tai tonglokja alirtem dang asüingdangya asüidang agütsüba kulitem nung ajemdaker, ken o ka benokogo" ta Bengaluru police-i metetdaksü.

Mezüngbo iba video ya Bengal aser northeast len kanga prokshi aser tetsürlaji iba tesem nungi asütsü akok ta jembiba agi Assam police-ibo tai tonglokja alirtem indang osang agütsür nem senpet agütsütsü osang sangokja liasü.

Tai tonglokja alir nisung pungupronglaji Bangladesh nungi lir aser senotsü tsütsü mangatetep adokba agi parnoki tetsürla reshikangshiba. La-a Bangladeshi tsür ka lir aser nisung shibelenertemi India-i anir aruba liasü, ta police-isa metetdaksü.

Tetsürlaji tanga state ka nung lir aser la anir arutsü atema police telok ka ogo. La aruba

stülen magistrate tsüingdang kuli bendentsü, ta parnokisa ashi.

Tai tonglokja alirtem aser tetsürla nungerji Bangladesh nungi lir aser parnok Bengaluru nung para ki ka nung külemi liyonga aru.

Parnok ya teküp ayokba maparen inyaka liasü aser tetsürlai sen bener jena ao. Ajsüüaka, teküp ayokba mapa tenzüksangi la bushitet aser lai sen meyipa magütsütsü ta ashiba agi reshikangshiba.

Külen, Bangladesh police-ibo ita asem tejakdang Dhaka, Bangladesh kübok Magh Bazar nung iba ya atalok ta metetdaksü.

"Bangalore Police dang kanga pelar. Bapa DCP East Bangalore-i anir iba ken o bushisüingdanga nisung tamajungtem apuba atema tenüingsang agütsür" ta Special Commissioner of Delhi Police aser Helping Hands NGO president, Robin Hibu-ia metetdaksü.

Asemben tashi Mr Meghalaya adoker ka Covid-19 agi asü

Shillong, May 28, 2021 (Agencie): Mr. Meghalaya asembe tashi takok angusang Pynshngnain Langpen COVID-19 agi shiranga süogo.

Arishi küm 38 tain bodybuilder Pynshngain dak COVID-19 aliba putetba sülen mozü ki ka nung anepalua arur

Brihostibarnü asü.

Pynshngain-i Body Zoo Gym nung training agi aser 2014, 2015 aser 2016 nung Mr. Meghalaya takok nguteta liasü.

Pa ya sculptor ka liasü aser Riti Academy of Visual Arts nunga züingsema liasü.

May 25, 2021 nü Meghalaya

nungi taoba state kick boxer Bresterwell Kharumnuid Covid-19 ajanga asü.

Bresterwell Kharumnuid ya Meghalaya State Kickboxing Association, Meghalaya Kurash Association aser MMA Meghalaya nung founding member ka liasü.

Meghalaya & Arunachal nung Covid19 lockdown atsülanger

Shillong/Itanagar, May 28, 2021 (Agencies): Covid19 kanga putetba agi Meghalaya aser Arunachal Pradesh sorkartemi lockdown atsülangtsü telemtetbatem agiogo.

Meghalaya nung East Khasi Hills nung lockdown June 7, 2021 anepdang 5:00 tashi atsülanger ta Meghalaya chief minister Conrad K Sangma-i metetdaksü. Külen, Arunachal Pradesh sorkari Itanagar Capital Region (ICR) nung anogo tenetnü atema lockdown atsülangongo.

Anogoshia nisung aika dak COVID-19 puteta aruba agi ICR nung lockdown atsülangtsü lemtet.

Maneni, Tawang, Upper Subansiri, Lower Subansiri, Namsai, Lohit aser Anjaw nung lockdown anogo tenetnü atsülanger, ta Arunachal Pradesh Chief Minister Pema Khandu-i ashi.

"Arunachal Pradesh danger zone nung lir. Asenoki iba tashidak azüoktsü atema akangakanga inyaktsüla" ta Pema Khandu-i ashi.

Arunachal Pradesh nung anogoshia nisung aika dak COVID-19 puteter.

Brihostibarnü Arunachal Pradesh nung nisung 444 dak COVID-19 aliba putet aser parnok züingsema tang nisung 3692 anepaludar.

YouTuber Paras Singh Itanagar-i anir aruogo



Arunachal Police ketdangsürtem den Paras Singh (achiji nungi tanabuba) noksa nung angur.

Itanagar, May 28, 2021 (Agencies): Arunachal Pradesh MLA Ninong Ering dang 'Chinese' ta ajaba YouTuber Paras Singh anogo ka police ket nung ayutsü temelaba agütsü.

Itanagar nung aliba Court of Judicial Magistrate (Fast Track)-i iba temelaba agütsü.

Arunachal Pradesh MLA Ninong Ering dang 'Chinese' ta ajaba dak alia Paras Singh-i pa indang YouTube channel nung India kübok Arunachal Pradesh

adenba ashishitepa liasü.

Paras Singh ya Punjab kübok Ludhiana nung alir aser Arunachal Police nung Special Investigation Cell telok kati pa Itanagar-i anir aruogo.

Ludhiana nung okadak kati temelaba agütsüba sülen police teloki Paras Singh anir Brihostibar nikongdang state yimtiba tonga aru.

Arunachal Pradesh kübok police station balala nung Paras Singh anema ken o 10 shi benoka lir.

Assam sorkari BTR region nung 'Arunodoi' scheme tenzüksü

Guwahati, May 28, 2021 (Agencies): Assam chief minister Himanta Biswa Sarma-i Honibarnü Bodoland Territorial Region (BTR) nung 'Arunodoi' scheme tenzüksü atema senden ka ayonga menogo.

BTR nung Arunoday aser Swayam Scheme tenzüksü atema senden amendang BJP national general secretary Dilip Saikia, BTR Chief Executive Member Pramod Bodo aser cabinet minister U G Brahma nungertem aden.

DBT ajanga BTR nung sensakertem kibongtem nung tetsürtem indang bank account nung ita shia Rs 830 enoktsütsü. Ano, self-help group nung züingsema alirtem shishilembaba nung yaritsü atema shilem ana lemsar sen agütsütsü. Tan June ita tatemen tashi nung BTR

nung lanur 10,000 shi kati iba scheme kübok tajangzüik angutsü.

Assam nung direct benefit transfer scheme tulutiba 'Arunodoi' ya sensaker kibong lakh 17 nem teyari agütsütsü atema tenzüka liasü.

Iba scheme ya yaküm December ita BTR region dak alaka Assam kübok district ajanga nung tenzüka liasü.

Taoba finance minister Biswa Sarma-i election nung Chief Executive Member (CEM) Hagrama Mohilary tamakok ngudaktsütsü atema nübertemi yarira iba scheme tenzüksü ta nangzüka liasü.

BJP, United People's Party Liberal (UPPL), aser Gana Suraksha Party (GSP) teloktepi sorkar akümtsü tashi anguba ajanga item scheme tenzüksür.



Guwahati nung aliba Board of Secondary Education Assam (SEBA) office nung All Assam Students Union (AASU) Chief Adviser Samujjal Kumar Bhattacharya-i osangbener den jembidang agiba noksa angur. (Guwahati, May 28)



TIR YIMYIM

YIMOBILEM (EDITORIAL)

DIMAPUR KÜPTOKNÜ, MONUPII (MAY) 29, 2021

Anosa mokdangtsü !

Covid wara ayimsünga moudaktsüi nokdangtsü atema tang hopta ana, May 31 tashi ya mokdangtsü (lockdown) Nagaland government-i özüing agütsüba ama, tesem ajaklen nübertemia tangatetba tajung nung, tamalen ama masü, tangbo kanga tashi angaa anidakba angur. Atangji, akhi alu mapa kecha meinyak aser lokti senden kecha melidaktsüi kidang mongdaktsür asünungji, temalen nungi reprangtsübo anisüngzüka amonger amai saka shitakbabo nisung aika temulung amsaa takoksa nung amonger. Aji oda, joko anogo ana lirbo mokdangba ya lapoka pei akhi alu mapa tenzüksü ta bilema alidang, ano June 11 tashi mokdangtsü government-i lemtetba osang ya aika atema osang tajung masütsü. Ajisüaka, anogo talila mokdangtsü telemtetba agibaji government nung alirtem atema tajangzük bushiba mapa ka masü saka nübertem inti taküm kümzüksü asoshi, timtem takoksa ajuruaka, ano hopta ana shi mokdangtsü anogo atsülanger. Atangji, tangalenbo, tashitemeteterem lima nung dena, Covid tashidak memenatsü atema nübertem mokdanga ayuba maginü nübertemi longkak aita anema apusor saka asen lima nungbo medical expert-tem dang nungibo lokti tentet tanishirtemiang Covid tashidak nokdangtsüba mapa nung ya süoki taiba ia bilemer, ibayongji government-i mokdangtsü telemtetba magidangyongi lokti tentetemi mokdangtsü akanger. Ibaji junger. Ajisüaka, tang amai khen nung atonga-atonga anogo metsü semer nübertem aluia mao aser business-tema ajak shibanga yur kidang mokteptsüba yabo khen bilemdangtsü adoker. Iba yagi loktiliba tesünep nung melitetsüsa Covid dang nungi tesashiba lokti tebilemstü arutsü ana nung lir. Kechalania mao chiyonga kazütsübaji takarterem asoshia jangratemtsükabo masü aser sensakertem asoshibo lockdown mapang ya shisabolu tali tali bendenlokba mapangang ka lir. Item ajakji asadanga tashidak wara nokdangba den külemi nisung ajak rongsen tsütsü takoksa mengui mapabo inyaksüsa government nung ketdangsertemi sentong tapet yanglua lenmang lapoktsütsü imlar. Asenokia kodang Covid tashidak anema mokdangba indang ya bilemdangdir, nisungtem kechalania moudaktsüi sotba tetezüji, nisung ka nungi ka dak tashidak memenatsü atema saka mapa teinyak tabo mashir, anungji nisung o nisung na tashidak menatsüsa majurutepi kodaser mapabo maneni inyaksüla ta asüba nung asenok ajaki bilemdanga inyakyim sentong ka atongtsüla. Tebilem nung yaküm nungi ita junga mokdangba sentong liaka, tsümar aluyimertembo kecha balaka mapa meinyaktetsüsabo anogo kata majurui alitsü südi ta bilemer, kechiyong parnokbo alu nung dang alir. Ajisüaka, asenokbo yimtak mesüra town ka nung dang akhi tsüraburtemi yim akümba yimya nung dang tanü tashi alir, iba jagi tanü ama tashidak wara mesüra alima tensa mapang majungba agi mokdanga ayudang mapai moutetter. Asenok asoshi tang ajuruba takoksa aser tebilemdangtsüji aji asütsü. Aji oda, alima tashidak wara tensa mapang ya yamaisa ao nungbo, mokdangpet mokdangtsüsa adoktsü, anungji mokdangba nungi jenteta asenoka tashidak memenai temang nung asentzü endoka mapa inyaka alitsü atema lenmang kar bushiteptsüla. Item lenmangtem rongnung kaji, asenoka tsümartem amato alu jen agi taliba ki kümer alu nung lia alu inyaka alitsüsa tanü tensa dak apet sobaliba tasen ka tenzüksüla. Iba jagi yimer aser tangarterem nungi pilaa (social distance) asenok kija mapa inyaka litettsü. Ano, alu mayimertem atema mokdangba mapang mapa kabosa inyaka alitsü atema nungdakba osettsüset aser hadir bushiteptsüla. Iba atemaji government-i mokdangba mapang jangotsü dokan lapoktsüba ama, osettsüset ayokba (hardwares) dokan hopta nung ken anabenkabo lapokdaktsütsüla. Alima nung sobaliba tajung ajak ya mapang tamajung ajanga tentetbatem lir aser nisung nungdakba osettsüset ajak ya timtem ajuruba ajanga nungdak reprangteta yanglutetbatem lir. Iba kasaji tanü asenoki ajuruba Covid timtem ya ajanga asenoka mapa aika nung putu dak apet sobaliba tajung tenzüka aotsü imlar. Aji oda, kimaleni ao majung tashidak lirji, kecha inyak majung mokdanggerji ta kisüing bilema mekazüi, süra mokdangba mapang kechi mapa, koma inyaksü aser kechi nungdaker (?) ta bilema asenoki anir mapa inyakyim aser libaliro ajak nung sobaliba tasen aser tajung tenzüktettsüla, kechiyong asenok akhi sobalibatambo mapet kümogo aser joko mapettsü.

OLEMSABANG

FALL ARMY WORM (FAW) MESEN ANEBALUYIM

Contributed By : **Temsutola Jamir**
Block Technology Manager,
ATMA, Mokokchung.
 Courtesy: ATMA Mokokchung.

(Yashi adok nungi...)

FAW NUNGI KOMA KUMZÜKA ALITSÜLA:

Cultural practices:-

1. Metsü meyok tsüingda alu nung aliji jung junga tosatsüla (plough). Iba ajanga FAW züla ali telong nung aliba temai adokdaktsür aser özüttemi achitsü aser anü tashi agi sūdaktsür.
2. Metsü mapang shitak nung yoktsüla. Kokra March ita nungbo yokadok tajungba.
3. Mentilu nung menti den külemi teputeb pulse crop (motor, Kholar, alizüingken, azükzüingken, beans amala) tsünua junger.
4. Alu merüka ayutsüla aser mol tadakzük shitak amshitsüla.

Mechanical measures:

1. Alu nung FAW longben mesüra entsü repranga or külen, ngura tekai bendena menüngseta endok mesüra kerosene nung metena tepsetba junger.
2. FAW lira tou adoklen tedong talaklen lisem (sand) takong enoktsüyonga aoa junger.
3. Pheromone traps (Spodoptera frugiperda) amshia FAW shinü tebong budena tepsetba junger. Pheromone trap ya alu acre ka nung trap 15 tashi amshitettsü. Item traps ya alu nung enoker hopta 5-6 lir ano trap tasen-i melentsüla. Item traps ya akok tashi tsüinglu nungi kümzüka ayutsüla aser mendidong nungi feet asem tema amenloktsü junger. Pheromone traps ya kodangsa alu nung shinü yimzüa ngudir, iba mapang nung ang amshiba tajangzük lir.

Bio- control measures:

1. Alu nung FAW achiba shirurutem (natural enemies) wazüka ayutsüla aser kokra tsünütsü tapu balala külemi tsünütsü mesüra naro kar den meyokteba tsünütsü yokba junger.
2. Alu acre ka nung Trichogramma spp. 50000 shi amshia mesen anepalutsü akok.
3. Metarhizium anisopliae ml pezü (4) tzü liter ka nung meyokteper mendi dong ajunga nung tongtipangsa tuo tsüinglanglen temulung agüja ayintsüla. Iba ya metsü anogo 15-25 yoker sülen enoktsü mesüra iba temeyoktepa ya anogo 10-15 tetsüingda nung süngdong nung ayinba junger. Saka tamasa tzü half litre nung iba mozüya meyokteptsü aser aonung sangwa yujang. Tasüingüji ano tzü half litre enoksema one litre mozü solution yanglua mendi nung arüktsla.
4. Bacillus thuringiensis ml 2 tzü litre ka nung meyokteper mendi dong nung ayintsüla. Iba ya dokan nung Minchu+ tenüing agi angutsü.
5. Neem formulation (NSKE) ml 4 tzü liter ka nung meyokteper anogo 6-7 tsüingda amshiba junger. Iba neem oil ya meseni timtem magütsütsü atema alu tesem kolen mesen ano

Metarhizium, Michu+, neem aser pheromone trap teyaritem Green Line Enterprise Indian Oil anasa aliba dokan nung angutsü. Metarhizium ya Metagreen tenüing agi dokan nung angutsü. Greenline enterprise den tongteprateptsu atema iba contact no. den tongteprateptsu akok @ 8974158169. Mozüaguja aliba tem takok tashi tou talak temulongtem nung enoktsütsüla kechiaser FAW ya aonung chiyimba longben asü nung pa anüingdangbo tou temulong telong nung atsüka alir. Ano FAW aliba alu anasa alir tema FAW meliaka akok tashi neem oil tsük mesüra mendi nung asemtsüla. Iba ajanga FAW nungi kumzuktsü. Mendi lu mesen nungi jenbua alitsü atema, neem oil 4-5 ml tzü liter ka nung meyokteper ayintsü akok.

FAW komaser belenshir:

1. Chiyongtsü mesura metsü tapu balala alima tesem ka nungi ka dangi belentepba ajanga FAW küra küra belenshir.
2. FAW-i tzü mopung kanga temükong metizüker, FAW ya alima tatsük aser mopung nung tzü tali (humid) tesemtem nung tali renloker.
3. FAW poktetbaji mopung aonba mesüra tsüinglu aruba yimya dak tuluka keta lir.
4. Alima tzü mopung melenshiba ajanga iba mesen tali renloka aotsü akok.
5. Tzü mopung 20-32 degree Celsius kong mopung tatsük aser mopung nung tzü (humidity) teimba alir mesüra tsüinglu talanglang maruba tesemtem nung FAW ya tesashiba angutsü.
6. Alima tensa, tzü mopung aser tsünüsempongtsü peria anguba linük shisadanga, FAW arentsü atema India lima eastern tsütsü ya tetemsüba lir ta Centre for Agriculture and Bioscience International (CABI)-i bushiteta lir.
7. CABI-i sa ashiba agi FAW ya Africa nungi India linuk-i southwest monsoon mopung koba küm shia june ita nungi September tashi aoner, iba mopung ajanga bener aro da bushitet.

Iba mesen asen yim nung adokba angudang tekaratiba agi District Agriculture Office, KVK mesüra ATMA office dang ATMA Farmer Friend janga mesüra pei sasa osang agütsütsü asüingdang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

NJCF-i June ita piyong Covid atema sarasademtsü ayongzüker

Dimapur, May 28 (TYO): Coronavirus wara atema Arogotem aser tamangertemi onok den külemi longjemer sarasademba atema ajak dang pelar, ta Nagaland Joint Christian Forum (NJCF) Tir, Rev. Dr. Zelhoh Keyho-i sangdong ka ajanga metetdaksü.

"Tang asenoki tayongzüka tensa balaka ajangshidar. Asenoki iba wara atema sarasadem aser taneptsürji Tsüngrem dang lir ta asenoki amanger. Ibaji ochi, aser ibaji asenok tamang, ajisüaka asenok pei sasa kümzüka alitsü atema Tsüngremi asenok nem teinyaksü shilem agüja lir," ta NJCF sangdong nung shia lir.

"June ita ya Covid-19 atema sarasademba ita asütsü, ta nenshia metetdaksür. Iba dak sendakba nung NJCF-i Arogotem nung pastor tem dang Arogo züngsemtemi anogo shia sarasademtsü atema sentong yanglua agütsütsü mepishir. Anogo shia mesüra hopta shia atema mapang latettsü aser sarasadem onük yanglua agütsütsü akok," ta sangdong nung shia lir.

"Coronavirus prokba nokdangtsü atema nisung o nisung na tsüngda tetsüngda itta alitsüla, tamang jenjang akhangshitsüla aser quarantine mapang nung tanela nung longjema alitsüla. Iba atema tashi tuluji sarasadem lir.

Sarasadem ajanga asenok Tsüngrem den sendaktepba den külemi asenok tanela nunga longjemer. Sarasadem nung asenok kija masü saka longjema lir. Nija sarasadem agiba den külemi Arogo lenirtem aser pastor tem teyari agia technology amshia asenoki kiyonger den külemi mesüra meta talang nung alirtem den külemi longjemer sarasademtsü akok. Telephone ajanga shirangertem mesüra self-isolation nung alirtem atema sarasademtsütsü akok. Text message ajanga mesüra social media platform balala amshia asenoki Tsüngrem den aser kiyongertem den tanela nung longjema alitsü akok," ta NJCF

sangdong nung shia lir.

"Asen ket nung alibatem asenoki tajungtiba nung amshidi. Tang ama tensa ka nung teimla aliba nüburtem ama sarasadem ajanga asenok longjema lidi aser Tsüngrem den tesendaktep yudi. Tang mapang ya Arogo aser Khrista temang angatettsü mapang ka lir. Tenla ki shibangogo, ta mebilemi asenok tanela nung longjema lidi," ta sangdong nung shia lir.

"Nagaland ama Khristan nütsüng shilem 90-95 aliba state ka nung Khristan ka ama asenok khuret tulu lir. Asenoki asen lenirtem, yimsüsürtem aser nüburtem atema sarasademtsüla. Iba denji külemi mongintemi ashiba angatsüla. Tenla kidang lokti tekülem sentong agiba anenba indang aika jembia aruogo. Tenla ki meshibang saka wara aliba ajanga lokti adenshiba sentongtem ya wara prokdaktsüba agent ka kümogo. Iba tashidak keta alirtem asenoki metet asü nungbo, asenoki iba wara nokdangtela, saka yamaji masü. Anungji asenok tamang jenjang manokshitsüla aser iba wara anema raraba nung Tsüngremi asenok yaritsü ta tamang akatsüla, iba denji külemi asenoki ketdangsertem aser mongintemi tuyuba tashi angatsüla," ta kasa sangdong nungsa shia lir.

"Asenoki tang ama tensa ya kodanga majangshidang. Asen lima melenshiogo. Covid agi koma kongshitsü, ta asenoki tsübur aser tebilemstü akar. Social media, television, radio aser osangkakettem nung osang balala prokba ajanga asenok mangmangteper aser kechi inyaksü, ta ratamatadar," ta sangdong nung shia lir.

"Tamangertemi mejangjaba osangtem meprokshtitsüla. Asenoki Arogo züngsemtem nem vaccine agiba indang angatetdaksütsüla. Yaküm asenoki vaccine atema sarasadema liasü, yamaji Tsüngremi asen sarasadem langzüogo, ta asenoki amangtsüla. Vaccines mesüra

mozütemji asenok yirutsütsü atema masü saka asenok ajungtsü atema aser kümzüksü atema lir," ta NJCF-i metetdaksü.

"NJCF-i Khristan nütsüng timba aliba state nung Khristantem dang Tsüngrem leniba nung iba wara anema raratsü ayongzüker. Asenoki züngsemtem nem awareness agütsüdi aser ketdangsertem nem khuret tali mebendenloktsüdi. Asenoki osang shidak sangdongba ajanga ibaji inyaktettsü. NJCF-isa Arogotem dang teyari nungdakba züngsemtem yaritsü mepishir," ta NJCF-i metetdaksü.

Temetettsütem:

* NJCF-i Naga nung er ajak dang June ita ya Covid-19 atema sarasademba ita sädaktsütsü mepishir aser Pastor tem dang züngsemtem den sarasadem onük lemsateptsü mepishir.

* Khristan nütsüng timba aliba state nung iba wara anema Khristantemi tongtibang shilem agütsüla; Arogotemi iba tashidak agi shirangertem mesendoktsüla.

* Asenoki timtemertem, iba wara agi kongshirtem aser shirangertem yaridi aser züngsemtem olulu nungi jenbua alitsü atema tesayuba agütsüdi.

* Asenoki ketdangsertem den amalitepa yaritepdü aser iba wara anema raraba nung asenok kati ka yaritepdü. Iba wara mapang nung asenok timtem bendenloktsürtem masü saka shilem tajung agir kaka kümüdi.

* Asen anasa alir timtemertem aser nungdakbapurtem yaridi.

* Vaccination teyari densema mapang shidak nung teyari bushitsü atema asenoki ajungshidi. Tenla ki meshibang saka wara nungi kümzüka alitsü atema lokti tekülem anena atar dang ta angatetdi.

* Ketdangsertem tuyuba tashi angadi aser Tsüngremi asenok dang taochi sayutsü, ta amangdi.

ANOGO ABEN TSÜNGREM DEN

Tsüngremi senzüka meyutsür

"Barley tsük tatak trok ya pai kü nem agütsü, kechiyong pai ashi, ne kinungtsü tetsü dangi ne teka tazüng maotsüla." Ruth 3:17

Mapang talangka lir Naomi aser lar kibong Moab lima nungi Bethlehem-i meyiba arudang alu roya liasü. Makamait anungji tsükdok shimtsü asoshi Ruth takar alui ao aser lai tsükdok shidena bener aru, aser la kinungbo tetsü tena chiyunga-ajem. Khünü anogo Ruth kidangi meyiba aodang, Boaz-i la kinungbo tetsü dangi teka tazüng maotsü asoshi barley tsük tatak trok ataka bener yok. Iba temoatsü ngua Naomi kanga pela, kechiyong Boaz-i bener yokba tsük ajanga tarutsü anogotem asoshi temoatsü liasü.

Saka Peter-i ashi, "Ni tarabi aser hon maka..., Nazaret nung Yisu Khrista tenüng nung jangjang..., idangyongsa pa tetsüng aser tenüklangret tashi itda aküm" T.Mapa 3:6-7. Moatsütsü asoshi Tsüngremi Ruth nem Boaz ajurudaktsü. Iba ajanga Naomi tepetzük tia nungi jenjang tajungba aküm, Ruth tanaben kibong aküm aser senmanger moatsü. Iba kibong nungi Israel nung chuba menden nung amentsüsa jakzük. Tsüngremi moatsütsü asoshi asen taküm nem nisung balala ajurudaktsütsü, asen dangi arur ajak den sarasadema ajurudi.

Sarasadem

Yisu nai moatsütsü, aneptsütsü sentong tajung yanglur, kü taküm item ajak nung shilem tajung agitettsü yariangma. Amen

Bihar nung Pastor ka dak azükba sülen treatment agidang Covid mena



Pastor, Ramnivas Kumar ICU nung amongdang tangokba noksa nung angur.

New Delhi, May 28, 2021:

Taoba ita Bihar nung Hindu yimsü alia amangertemi pastor ka dak azükba sülen hospital balala sema senzüdang coronavirus tashidak menaogo, ta osang ka ajanga metetdaksü.

April 22, 2021 nü Bihar nung Sitamarhi district kübok Pritamadi yimdak Hindu nungeri Pastor, Ramnivas Kumar dak azükba mapang nung pa tapo yiruba den külemi temang telung yirua liasü.

Parnoki pastor kinungtsü, Pinky Kumari aser pastor Kumar'er kinünger, Nagendra Thakur na dak-a azük. Pastor kinungtsü tekolak nung zübu keta pezüben arr aser Thakur-a tekolak nung zübu keta tiben arr.

Hindu nung yimdaklirtem jagisa par ki den main gate aser tzü rizüngba tank raksatsü aser par kidang nungi sentioset kar auyar ao.

Parnok dak azükba anogo nungji sorkar hospital ka nung Pastor Kumar nem mapang shidak nung treatment magütsü, kechiyong parnoki police atatsüsa aküm.

Osangbener den jembidang Khristan lenir, Solomon Ghosh-i, "Onoki mapang talangka police ata-a liasü. Tesüsa nikongdang

3:00 ako nung police aru. Hindu nungertemi police dang, 'parnoki yimdaklirtem Khristan yimsü dangi meyipdaksüba agi yimdaklirtemi azük' ta ashi, anungji police-i aibelenertem anema ken o mebenok," ta metetdaksü.

Nikongdang 5:00 ako meta sorkar hospital nung staff temi Khristan lenirtem dang yirua alirtemji nija hospital kati anir aotsü tuyua liasü, anungji parnok Muzaffarpur nung aliba hospital kati ao, ajisüaka yangji coronavirus agi shirangertem aliba agi hospital nung magizük. Iba sülen parnok Sitamarhi-i oa hospital ka nung ang treatment agi.

"Medical treatment agiba sülen doctor temi onok dang, 'nenok hospital nung mongra coronavirus menatsüa akok' ta shia onok kidangi meyipa yok," ta Pastor Ghosh-i ashi.

Iba sülen doctor temi tuyuba ama anogo pongu lir parnok check-up agitsü atema hospital jagi ao. Treatment agitsü atema hospital aika sema senzüdang pastor dak coronavirus tashidak menaba sülen pa ambulance ka nung Raxual nung aliba Duncan Hospital-i anir oa ICU nung treatment agi. Pa anogo 10 nü ICU nung amongba sülen general ward-i anir ao aser tang tajungba lir.



Coronavirus wara mapang India nung Khristan charity telok, Samaritan's Purse-i timtemertem nem chiyungtsü lema agütsüba noksa nung angur.



Bhubaneswar, May 28, 2021: Cyclone Yaas ajanga teraksatsüba asadangtsü atema Hokolbarnü Ato kilonser, Narendra Modi Odisha yimtiba, Bhubaneswar tonga arudang Odisha Angh, Ganeshi Lal aser Chief Minister, Naveen Patnaik nati pa agizükba noksa nung angur.

Mamata-i PM nem Cyclone Yaas ajanga teraksatsüba report agütsü

New Delhi, May 28 (Agencies): Hokolbarnü West Bengal chief minister, Mamata Banerjee-i Ato kilonser ajuruba sülen pa nem state nung cyclone 'Yaas' ajanga teraksatsüba report ka agütsüogo, ta ketdangsertem osang ka ajanga metetdaksü.

Mamata aser Bengal chief secretary na review senden amentsü aliba building nung liasü saka tena senden jagi menor ang aru.

Ketdangser kati, "Ato kilonser Modi, state Angh, Jagdeep Dhankad aser Union Minister temi Bengal ketdangsertem ghonda tesadang shia aremzüka ata. Mamata Banerjee kanga aritepa sendeni aruba sülen Ato kilonser nem

cyclone ajanga teraksatsüba indang shidi kar (report) agütsü," ta metetdaksü.

Ajisüaka Mamata Banerjee-ibo, Digha nung senden amentsü osang lai memeteti liasü aser Ato kilonser dang nungi temelaba agiba sülen ang la oadok, ta ashi.

Trinamool Congress tongti, Mamata-i, "Ato kilonseri senden ayonga liasü. Digha nung senden amentsü alibaji onoki memeteti liasü. Ni Kalaikunda-i aoba sülen Ato kilonser nem report agüja Digha Development atema sen crore 20,000 aser Sundarban Development atema sen crore 10,000 temepishiba agütsü. State ketdangsertemi ni ajuruner, ta ni pa dang shia

temelaba meshiba sülen ang ni oadok," ta metetdaksü.

"Hingalngan aser Sagar nung review senden amenba sülen Kalaikunda nung ni Ato kilonser ajuru, aser cyclone agi West Bengal kongshiba osang pa nem metetdaksüogo. Digha nung teyari agütsüba aser teraksatsüba yanglushiba review senden nung adentsü atema ni Digha-i odar," ta lai twitter ajanga metetdakja liasü.

Hokolbarnep Modi-i Odisha nunga Cyclone Yaas ajanga teraksatsüba asadanga senden ka nung aden. Iba senden nungji Odisha sorkari cyclone lendong maneni atalokba ajanga timtem aika ajangshiba khuret pungbatsü atema state yariang, ta takhangba agüja liasü.

India nung ano nisung lakh 1.8 dak Covid putet aser 3,660 asü

New Delhi, Monupii/May 28 (Agencies): India nung ano nisung 1,86,364 dak coronavirus tashidak putet aser ibaji tesüiba anogo 44 tsüingda anogo ka nung tajemba putetba lir, ta Hokolbarnü Union Health Ministry-i metetdaksü.

Tesüiba ghonda 24 tsüingda linük nung ano coronavirus tashidak agi shiranger 3,660 süogo, ta Health Ministry-i metetdaksü.

Hombarnüa linük nung coronavirus tashidak 2000 den

tajemba puteta liasü, aser ibaji samples ajema tendanga aser staff agi anungba ajanga liasü.

India nung ano nisung 186,364 dak coronavirus putetba sülen linük nung coronavirus case ajak senteper 2,75,55,457 jungogo aser iba tashidak agi shiranger 3,660 asüba densemabo iba tashidak agi asür ajak agi 318,895 jungogo, ta health ministry data ajanga metetdaksü.

Brihostibarnü linük nung samples 20,70,508 tendang aser

tang tashi nung samples ajak agibo 33,90,39,861 tendangogo.

India nung coronavirus tashidak agi asürtem tajemba kümдар, ajisüaka state kar nungbo maneni nisung aika südar.

Tesüiba ghonda 24 tsüingda Karnataka nung nisung 476 asü, Tamil Nadu nung 474, Uttar Pradesh nung 188, Kerala nung 181, Punjab nung 178, West Bengal nung 148, Delhi nung 117 aser Andhra Pradesh nung nisung 104 asü.

Aluyimertem unions-i longkak tesashiba aittsü

New Delhi, May 28 (Agencies): Centre sorkari benokba aluyimba ozüing tasen asem anema longkak aiter aluyimertem unions-i parnok pusemertem dang aluyimertem longjemmer linük tesem ajaklen longkak tesashiba aittsü ayongzükogo.

Aluyimertemi aluyimba ozüing tasen asem anema longkak ait tenzüker ita trok jungogo, ta shia Jai Kisan Andolan lenir, Yogendra Yadav-i, "Aluyimertemi longkak aitba ya ozüing tasen asem anema dang masü, minimum support price (MSP) atema dang masü aser aluyimertem anemba sorkar dang tansütsü ka sayutsü atema dang masü, saka tangbo iba ya linük nung democracy kümzüksü atema lir," ta metetdaksü.

Aluyimertemi longkak aitba tesem- Shahjahanpur Border (Delhi-Jaipur Highway) nung jembidang aluyimertem union balalai akümba Samyukta Kisan Morcha (SKM) nung lenir, Yadav-i, "Tangbo iba ya aluyimertem indang onük dang masü saka linük nung senso ajak indang onük ka kümogo," ta metetdaksü.

Congress, TMC, NCP, DKM, Shiv Sena, Samajwadi Party, JMM, RJD, CPI aser CPI(M) densema opposition

party 12-i aluyimertem unions-SKM pusemtsü sangdongogo. Sorkari aluyimertemi akhangba magizükra sangküm küm tetenzüklen Uttar Pradesh, Uttarakhand aser Punjab nung assembly elections agiba mapang nunga aluyimertem longkak aitba ya tongtibang onük ka asütsü.

BKU (Tikait) lenir, Rakesh Tikait-i aluyimertemi 2024 küm (General election agitsü küm) tashi longkak aittsü renema lir, ta metetdaksüogo.

All India Kisan Sabha (AIKS) general secretary, Hannan Mollah-i, "Modi sorkari aluyimertem ola angatsü memelungra aluyimertem aser alu nung aayangertem longjemmer linük tesem ajaklen longkak tesashiba aittsü," ta metetdaksü.

SKM lenirtem- Darshan Pal, Gurnam Singh Charuni, Joginder Singh Ugrahan, Yudhvir Singh aser Jagjit Singh Dalawal nungeri külem sangdong ka sangdong ka ajanga, "Modi sorkar dang maneni ya nenshia metetdaksür- takhangba onük ajak magizükra aluyimertemi longkak aitba manentsü. Anogo aser itatem süia aodang aluyimertem tashi taitba kümдар aser pusemertem timba kümдар," ta metetdaksüogo.



May 28, 2021 nü Ahmedabad (Gujarat) nung drive-through vaccination kübok health worker kati tetsür ka nem coronavirus vaccine tutsüba noksa nung angur.

Taküm December tashi nung ajak nem vaccine agütsütsü: Javadekar

New Delhi, May 28 (Agencies): Taküm December ita tashi nung India nung ajak nem coronavirus vaccine agütsütsü, ta Hokolbarnü Union Minister, Prakash Javadekar-i metetdaksü.

Tamalen Health Ministry-ia, taküm December ita tatemanglen tashi nungbo linük nung tain ajak nem vaccine agütsütsü, ta metetdakja liasü.

Congress lenir, Rahul Gandhi-i Covid vaccination programme dak sendakba nung Ato kilonser, Narendra Modi aitsüba atema Javadekar-i Rahul aittsü.

New Delhi nung osangbenertem den jembidang Javadekar-i, Congress leniri (Rahul) jembiba oji nisungtem tsübudaksütsü merangba o lir, aser ibaji ajanga "toolkit" ya par party-i yanglu ta jangjar, ta metetdaksü.

BJP-i 'toolkit' ya Congress-i

adokba lir, ta aittsür aser Congress-ia parnokki masü ta shia police nem bushisingdang-daksütsüla, ta shiogo.

Javadekar-i, "Iba ya jangjaogo, kuli menüingdak. 'Toolkit' ya nai (Rahul) adok. Ni jembiba otem aser nüburtem mangmangdaksütsü merangba ajanga iba kuli jangjar," ta ashi.

Rahul Gandhi-i jembiba o ya linük aser nüburtem mezüingmeshiba o lir, ta pai ashi.

Tang tashi nung India nung coronavirus vaccine dose crore 20 dak tema agütsüogo, alima nung covid agi tamajungtiba kongshiba linük tanabubaji India lir aser taküm August ita nungi vaccine agütsüba maparen keraa inyaksü, ta pai ashi.

India nung coronavirus vaccine ana yanglutetogo; Covaxin vaccine yanglutetba mapang nung Congress lenirtemi iba vaccine ashishia liasü, ta pai ashi.



East Midnapore, May 28, 2021: Cyclone Yaas ajanga East Midnapore nung aliba Shankarpur beach nung Resort ka raksaja aliba noksa nung angur.

Jimmy Lai maneni tepuokdaki yoker

Hong Kong, Monupii/May 28 (Agencies): Hong Kong nung democracy busemer aser takataiter Jimmy Lai ya 2019 küm temelaba makai lokti adenshiba nung shilem agiba atema ita 14 tepuokdak ayutsü obendang agütsüogo.

Arishi küm 73 tain Lai ya kasa küm sa danga longkak aitba ka nung shilem agiba mechi tang tepuokdak yua lir.

Lai ya ajak sen tepuokdak ita 20 tashi tepuokdak alitsü.

Mainland China-i Hong Kong indang temeden anema tashiyim tali amshiba mapang iba obendang ya agütsür.

2019 küm October 1 nü ozüing agi memelai lokti adenshiba nung shilem agiba atema Hokulbarnü activist tejangja ter nem temerenshi agütsüba rongnung Lai ya densema lir.

Danga activist tem ya Figo Chan, Leung Kwok-hung shiba dang "Long Hair" ta ajar, aser Lee Cheuk-yan nungertem dena lir, shirnok ita 18 tashi tepuokdak ayutsü. Leung aser Lee na ya tang tepuokdak lir.

China nunger indang National Day nung longkak aitba mapang longkak aiter aser police tsüingta kanga sashia raratep, aser mapang tatsüka lir police tekolakbai iba anogo ya Hong Kong nung tamajungtiba anogo ka liasü, ta ashi.

Jimmy Lai ya linük nung national security law tasen benokba kübok ken o ana

benoka lir, kong taküm tepiyong tepuokdak ayutsü ozüing lir.

Iba ozüing kübok tejangja nisung aika apurtem rongnung Lai ya ka lir, aser iba ozüing kübok secession, sorkar tashi samatsütsü merangba, kiralongra mapa inyakba aser bendanger den lungjemer nokdakba aitsür.

Ibaji ajanga longkak aiter temelaba merenshir aser Hong Kong tashi ajemdaksür.

Hong Kong nung democracy movement busema nokdaker tejangja nisungtem rongnung Lai ya ka lir.

Pa ya sen billion \$1 dak tema jenjang, ta züingshir aser aben süoshi indang industry nungi pa rongsen kateta ano media nung pa tetsüing ajemoka Next Digital tenzük.

Next Digital yagi Apple Daily adoker, koba nüburtemi kanga sabua azüinger aser iba osang kaket yagi mapang shia Hong Kong aser mainland China lenir anema zülur.

Ita tetenzüklen ketdangsürtemi Lai indang rongsen soita ayu aser item rongnung pa indang bank account aser Next Digital rongsen nung pa indang shilem 71.26 dena lir, koba sen million \$45 jenjang, ta asadanteter.

Yimti nung Lai indang account nung tsütatepba kar danga lira küm tenet tepuokdak ayutsü, ta Hong Kong indang security chief-i HSBC aser Citibank dangi shidi yokogo.



Mount Nyiragongo nung volcano pokteta adoker anogo pongu lir Goma, Congo nung alirtem jena aoba noksa ka yangi angur. Iba tenem nung volcano ano mashi mapang ka nung pokteta adoktsü akok, ta North Kivu province governor Lt. Gen. Constat Ndima Kongba-i Brehostibarnep metetdaksü. Paise nütüing yongsük million 2 aliba yimti nung tesem 18 lemsar alidak tesem ter nungi nüburtem ainshitsü totuyuba agütsü.

Nigeria ketdangsürtemi tzüym nung nisung tasü mang aika agitet

Abuja, Monupii/May 28 (Agencies): Ayong nung senzüba rong ka tzüym nung mükepokba sülen Nigeria rescue worker temi Brehostibarnü nisung tasü mang 30 dak tema samar aser arakseta süogo, ta shisabulua lir.

Central Niger state aser northwest tsütsü Kebbi state kübok Wara tsüingta senzüba süng agi yangluba rong nungya nisung mener shishilempadaki aiba mapang süksar tzü telungi alu, aser Bodhbarnü nisung 20 dang kumzüketa liasü.

"Nisung tasü mang tuko talila ngutetogo. Tang tashinung

tasü mang 45 nguteta lir. Nisung temang ano maneni bushir," ta iba rescue operation ketdangsür Abubakar Shehu-i osangbener dang ashi.

Nisung talila amenba, tsüingsang majungba aser rong junga anepalu masüba ajanga Nigeria tzü lenmang nung rong lendong ya mapang shia ataloker, saka tawa-tanü atalokba rongnung Bodhbarnü asüba ya timba alitsü.

Nisung 20 dang takum kumzüket aser ano 156 samar bushir ta Nigeria inland waterways authority ajanga sangdongba sülen Tir Muhammadu Buhari-i iba

lendong ya tesasatsü lendong tulu, ta Bodhbarnü shia liasü.

Tekumzükter temi akok tashi kumzükba sülen ano samar alirtem maneni bushir, ta tzüma nung pongdaka ayuba jacket agir alisang Ali Ibrahim Garba-i rong anasa nungi ashi.

"Tang onok nisung asem bushir, tebur ka aser tetsür ana," ta pai osangbener dang ashi.

Iba rong nungya nisung 180 shi mena liasü, koba rong tashi dak alia lir aser rong apusor ghonda ka shi lir tzü telungi alu, ta NIWA agency nung ketdangsür Yusuf Birma-i osangbener dang Bodhbarnü shia liasü.

(Maneni tapak 9 nung...)

Syria tir kümsük pezübuba atema al-Assad maneni shimtetogo



Syria yimtiba, Damascus nung aliba Omayyad Square nung Syria Tir Bashar al-Assad busemertemi linük nisan aser Assad indang noksa amer benjongtepba noksa ka yangi angur.

Damascus, Monupii/May 28 (Agencies): Rara agi raksatsür aliba Syria nung Bashar al-Assad kümsük pezübuba tir inyaksü shimtetogo, kechiaser sorkar kübok aliba tesemtem nung vote agiba nungi shilem 95.1 pai angu, ta ashir, saka iba vote ya opposition aser anüolen linüktemi anema nokdaker.

Bodhbarnü agiba election osang ya Head of parliament Hammouda Sabbagh-i Brehostibarnü osangbener senden ka nung sangdong aser vote agütsür shilem 78 shi liasü, aser ibaji Syria nunger million 14 dak tema alitsü, ta ashir.

Al-Assad den tokteper nisung ana liasü, aser tenaji taoba mapang deputy cabinet minister inyaksang Abdallah Salloum Abdallah aser "tolerated opposition" züingsem Mahmud Ahmad Marei liasü.

Marei-i vote shilem 3.3 ngutet aser Salloum-i shilem 1.5 ngutet, ta Sabbagh-i ashi.

Election agiba sülen United States, Britain, France, Germany aser Italy linüktemi election tim mesüi agi ta ashi aser Syria nung telemsa adoka aliba opposition temi iba election ya asayamenü ka dang lir, ta shia liasü.

Saka iba election nung al-Assad tamakok ajurutsü teimla meliasü. 2014 küm taoba election agiba mapang pai vote shilem 89 shi ngua liasü.

Bodhbarnü election agitsü lia linük shilem asem sadanger shilem ana nung al-Assad tushia election poster tem prokshia liasü, kong pai yimsü asür.

Election osang ya mesangdong danga Brehostibarnü yimti aika nung Syria nunger meyririjang aika adenshia benjongtepa liasü.

Kar asem tema tsüingsang, kari Syria nunger nisan ayipten aser kari al-Assad indang noksa

beno liasü.

Linük yimtiba, Damascus kübok Umayyad Square aser tzükum nung aliba Latakia yimti nung Syria nunger nisung meyririjang aika adenshia benjongtep aser yamaji sorkar tashi ita amendaka aliba Tartus aser Latakia nunga adenshia liasü.

Syria south tsütsü Aleppo aser Sweida nunga nüburtem city hall jakdang adenshia benjongtepa liasü, ta osang ajanga ashi.

Iba election nung Syrian Democratic Council ajanga shilem magi, shirnoki northeast tsütsü totzü peria aliba region aser northwest tsütsü Idlib region nung yimsü asür, aser yangi alirtemi election anema Bodhbarnü yimti-yimtong nung jaja liasü.

Bodhbarnü election ya sorkari amokbanga aliba tesemtem nung dang agi, kong polling station nung nisung jenti adenshia liasü aser sentong renema aliba dang nungi ghonda pongu agi talila lapok.

2011 sülen azüdokshi tajemtiba aliba mapang election ya agishi saka rongsenketsüing kangasa mejungi kumogo.

Nütüing yongsük shilem 80 dak tema makamait tia nung lir, aser Syrian pound jenjang mejungi akumba ajanga

osettsüset nung sen tali temloker.

Al-Assad-i "Hope through work" yimyim nung ajemdaker nübu yima jaja, saka linük tanaben yangertsü atema sen dollar billion aika nüngdakba ajitet.

Rongsenketsüing jenjang kanga mejungi akumba ajanga al-Assad sorkar busemer tema temolung mesüi akum, ta Middle East Institute nonresident scholar Danny Makki-i ashi.

"Election nung takok anguba ya benjongtepa election sülen teblemtsü khuret tulu ajurutsü," ta pai ashi.

"Russia aser Iran linüktemi yariaka Al-Assad-i komaser rongsenketsüing jenjang tamajungbai meyoki Syira nunger teblemtsü ketdang sütettsü, iba mapaji tasak lir," ta tir indang tembar tongtipang ana athishia ashi.

Al-Assad ya 2000 küm tebu Hafez al-Assad asüba sülen referendum ka ajanga shimteta liasü. Al-Assad tebu Hafez al-Assad-i Syria nung küm 30 yimsü süa liasü.

Security Council Resolution 2254 nung 'free and fair election' indang shia aliba ama political transition kübok nung mesüi election ya agi, ta UN nung Syrian envoy, Geir Pedersen-i ashi.



Shamator, Monupii/May 28, 2021: Hokolbarnü, Tuensang District kübok Wapher yimtsung telungtet aser temeküt nung Shamator indang Assam Rifles-i Sanitization Drive achaayanga inyakba mapang tangokba noksa ka yangi angur.

Mon nung Vaccination Camp ayongzüksü

Mon, Monupii/May 28, 2021 (TYO): Brehostibarnü (27.05.2021), DC Mon, Thavaseelan K, IAS-i sangdong ka ajanga, District Task Force for Covid-19 Vaccination Mon-i May 31, 2021 nü anepdang 10:00 ako nungi nikongdang 3:00 ako tashi Local Ground, Mon Town nung tajangzük angutsüpur shirnok arishi küm 45 aser temapur, Frontline Workers aser Health Care Workers atema Vaccination Camp ka ayongzüksütsü, ta metetdaksü.

Iba Vaccination Camp mapang teküboklen agüja aliba tetuyubatem nung ajaki metsüngareta anidaksüla:
i) Tajangzük angutsüpurtem (Beneficiaries) pei pei gari

nung dang iba Vaccination Camp (Local Ground) yagi asütsüla.
ii) Four-wheeler gari dang melatsü.
iii) Gari nung nisung ana (two passenger) dak tema amentsü memelar.
iv) Tarur ajaki tejak nembangba mask inoktsüla aser social distancing temzüng nung anidaksüla.
v) Iba Vaccination Camp agiba anogo/tesem nung register asütsü (Onsite registration). Iba atema teküboklen agüja aliba document tem sayutsüla:
a) Tajangzük angutsüpur arishi küm 45 aser temapur atema Photo ID meshitsü.
b) Tajangzük angutsüpur,

shirnok FLWs aser HCWs lir, parnoki Employment Certificate sayutsüla.
vi) Vaccine agir sülen, temang nung timtem kar danga adokra aji metettsü atema, nai anena ayuba gari telung nung mener minute 30 atatsüla.
vii) Temang nung timtem/petsaperongba kar danga lira, Medical Staff tem dang metetdaksütsü atema na mena aliba gari nungi horn anaben agüjang. Idangjisa, na mena aliba gari tashi parnok tonga arutsü.
viii)Tajangzük angutsüpur, FLWs aser HCWs dak alaka, iba Vaccination Camp nung temelaba malir tangar shinga memelatsü.

Molungnen 0 lemsateper



ASO
19/8/1968

ASÜ
23/5/21

Onoki teti meima aliba temeim kinungbo I.Toshi Jamir G.B shirangba mapang nungi pa akümüli doktsür aoba anogo tashi Doctor aser nurses, yimmer yimsanger kinunger aser lokti shirnoki nübo, rongsen aser sarasadem agi ozü kibong den yaritipogo, nenok ajak dang pelaba lemsateper. Talisa Changtongya Kosasanger Putu Menden ajanga tang ama tenokdangba jenti aliba tensa ka nung pa temang yindak aremtsü temelaba agütsü nung nenok dang kangsa pelaba lemsateper.

Tsüngremi nenok mapa tajung moajangma

Temeim kinungtsü, chirnur aser kinungertem.



OFFICE OF THE
DIMAPUR NOKPU SENSO TELONGJEM
DIMAPUR - 797112 : NAGALAND

ASÜR MAONG IMCHEN, DOBASHI ASOSHI MULUNGKHO LEMSATEPER

Ozü lenir Maong Imchen iba lima nungi pilaba osang angashia aoksar aser mangyim khuret asür kinunger den Dimapur Nokpu Senso Telongjem-i (DNST) lemsateper. Ozü lokti nung züngsem tajung ka asür Maong Imchen shibai pa nübu aser shisatsü tajung lokti inyakyim, yimden aser sobaliba maparen ajak nung nungita len ania aruogo, pa asüba ya kinunger asoshi dang masü saka Nokpur ajunga asoshi kanga dang tesasatsü aser takoksa tulu lir.



Tang mapang tensa agi aseni ya-ang ajuru asünung, pa asüba mapang DNST aser yimer yimsangertemi asür kibong aser kinunger den arua inyakyim kecha nunga meyariteptetba atema sasar aser nemjema bilemer. Saka asen Teyanglur Tsüngremi ano maneni pa ama nübu tajung Nokpur rongnung adokdakjang ta DNST sarasadem südi.

DNST-i pai toktsür aoba kibong aser kinungertem den mangyim tejashi külem lemsateper.

Sd/-
L. Tinu Imchen
President.

Sd/-
Likok Longkumer
Asst. General Secretary.

iHeartRadio Music Awards : Dua Lipa aser Taylor Swift nati takok tulu angu



Dua Lipa

Taylor Swift

H.E.R.

Los Angeles, Monupii/May 28, 2021 (Agencies): Taoba küm (2020) piyong iHeartRadio station aser app tem nung sapua atemba/ angaba ken aser artist tem nem Brehostibarnü (27. 05. 2021), iHeartRadio Music Awards 2021 sentong nung tetushi agütsüogo.

Brehostibarnü(28.05.2021) Los Angeles kübok Dolby Theatre nung iba sentong agiba mapang takok angur tenüngtem sangoktsü. Nüngtugu rapper, Usher-i ketdangsüa (host) agiba iHeartRadio Music Awards

2021 sentong nung, The Weeknd-i nomination timtiba (8) ngua liasü. Iba artist sülen, Megan Thee Stallion aser Roddy Ricch napronglai nomination tenetnet aser Harry Styles-i nomination trok angu.
iHeartRadio Music Awards sentong tenzüka Ariana Grande den The Weeknd nati ken aten. Ariana kibong kümer sülen lokti sentong ka nung lai mezüng shilem agia liasü. Iba award sentong nung takok tulu talisa Best Female Artist, Male Artist aser Best pop album of the year' angur

rongnung Dua Lipa, The Weeknd aser Taylor Swift nung dena liasü. Elton John nem iHeartRadio Icon Award agütsü; kasa mapang Beyonce, Maren Morris, BTS, Harry Styles aser tanga artist balalai award tajung nguogo.
Ariana aser The Weeknd dak alaka, iba award sentong nung Demi Lovato, Brandi Carlile, Paak, Dan plus Shay, Doja Cat, Bruno Mars aser tanga artist temi ken tenogo. Elton John nem tetushi agüja Brandi Carlile aser H.E.R. nati Elton indang ken tena liasü.

Danlepdong sector nung ki ka shibangtsü

Noklak, Monupii/May 28, 2021 (TYO): Noklak kübok maparen dak sendakba nung, iba Danlepdong sector nung nisung kidangi aotsü atema temelaba alir ka dak Covid-19 tashidak putetba nübutem (authorised personnel) dang melatsü.
dak sendakba nung aser tekümdangtsü mera agütsü Anüngji, nisung kari danga iba asoshi, Deputy Commissioner, tetuyuba nung aibelenra, IPC Noklak, Remy Wilfred, IAS-i indang Section 188 kübok sangdong ka ajanga, osang merenshiba dak alia, Disaster tejangja ka magütsü tashi Management Act 2005 indang Danlepdong Sector indang Section 51 nungi 60 nung agüja House No.42 shibangtsü asoshi aliba tashi amshia temerenshi tetuyuba agütsüogo. tapet agütsütsü, ta DC-i shisem.

Nigeria ketdangsürtemi tzüyim... (Tapak 8 nungi...)

Ajidang masü iba rong ketdangsürtemi item ozüng nungya hon atoba tesem ka aiben mamshir.
nunggi lisem bena liasü, ta yanggi May ita tetenzüklen Niger district administrator Abdullahi state nung nisung tali mena Buhari Wara-i ashi. aliba rong ka mükepoka nisung NIWA ajanga lendong nungi 30 asü.
kumzüksü mechi ayong nung Maneni rong ka nung yanggi aonung rong senzüba nokdanga aliba shishilempar 100 mener lir aser rong nung nisung talila shishilempadak nungi meyipa abenba ya mapa tamajung shilangba mapang yipru ajurua inyakba ta aitsür, saka rong rong ya ana kuma sadanga liasü.

ICC-i WTC final indang temzüng sangdongogo

New Delhi, Monupii/May 28, 2021 (Agencies): India aser New Zealand tsüingda aruya aliba mezüng World Test Championship indang final atema, International Cricket Council (ICC)-i Hokolbarnü temzüng aser inyakyimtem sangdongogo.

Southampton kübok asayatsü aliba WTC final nung India aser New Zealand naprongla draw mesüra tie süra te anaprongla 'joint winner' ama takok marok agütsütsü.

Iba Final indang asaya anogotem nung mepetmesü mesüra timtem kar ajanga masayatetsüsa anogo ajurura ibaji küpdangtsü atema, ICC-isa 'Reserve Day' ka shima yua lir. Team ana tsüingda June 18 nungi 22, 2021 tashi asayatsü aser June 23 anogoji 'Reserve Day' ama lateta lir.

Anogo pungo abensa asayatsü atema 'Reserve Day' ya agiteta ayur aser item anogo nung renemba ama masayatet mesüra asaya athitsüsa aküm nungang, iba anogo (Reserve Day) ya amshitsü.

Iba test asayadang tetsükdaktsü adoktsüsa tensa ajurura, ICC match referee-i team anaprongla aser media dang Reserve Day dak

sendakba yimyatem metetdaktsütsü.

"June 18 nungi June 22, 2021 tashi asayatsü aliba Final nung tensa agi team anaprongla draw mesüra tie asütsüsa kümra tenaprongla nem külemi takok jenjang agütsütsü. Iba den külemi, item asaya mapang anogo kar nung timtem adoktsü süra, ibaji küpdangtsü atema 'Reserve Day' amshitsü, koba June 23 anogo agiteta lir. ICC World Test Championship tenzüksü lia, 2018 küm June ita telemetba anaprongla agizük," ta sangdong ka ajanga ICC-i metetdaktsü.

"Renemba ama anogo pungo abensaa asayatsü atema Reserve Day' lateta ayur aser anogoshia asaya atema latettsüba mapang shitak nung metemra iba anogo amshitsü. Anogo pungo tashi abensaa asayar sülen telok kati danga takok anguba osang melira anogo talila mesükloktsütsü aser iba ama tensa ka ajurura iba asaya draw ama sangoktsütsü," ta ICC-ashi.

"Test asayadang mapang aobatem atema, ICC Match Referee-i team aser media dang Reserve Day amshitsü yimyatem indang osang agütsütsü. Reserve Day

amshitsü mesüra mamshitsü atema pungonübuba nung telemetba agitsü aser iba osang sangoktsütsü," ta ICC-shisem.

Iba final Test series ya Grade 1 Dukes cricket ball tem amshia asayatsü. Kasa mapang, final asayadang international asaya jenjang dak sendakba nung temelenshi nung anidakba angutsü. Iba temelenshi ya tang Bangladesh aser Sri Lanka tsüingda asaya aliba ICC Men's Cricket World Cup Super League series nung amshidar.

* Short Runs: On-field Umpire ajanga asüngdangyaba 'short run' mashika Third Umpire-i asadangshitsü aser taruba ball maondang On-field Umpire dangi iba osang agütsütsü.

*Player Reviews: Tasayadak nung LBW atema asayar kati asadangshitsü/reprangshimtsü asoshi asüngdangba dak sendakba nung telemetba agütsütsü lia, fielding captain mesüra out sütsüba batsman ajanga Umpire den osang jangjashitsü akok.

*DRS Reviews: LBW reprangshimtsü atema, Wicket Zone indang metong tasazük stump temaba tashi ajungkettsüo.

India tetsür cricket team pur Covid-19 vaccine mezüng dose agiogo

New Delhi, Monupii/May 28, 2021 (Agencies): Kanga dang yongya ataba UK Tour tenzüksü lia, India tetsür cricket team nem Covid-19 vaccine indang mezüng dose agütsüo.

Tang, India tetsür team Mumbai nung quarantine' südar. Bristol nung Test ka densema, June 16, 2021 nü nungi tenzüka parnoki UK tour nung asayatsü terenemba lir. T20Is sülen, July 9 aser 11 nü Northampton nung Test match asayatsü. Aji masüdag, June 27, 2021 nü nungi tenzüka ODIs asem asayatsü.

Board of Control for Cricket in India (BCCI) otongdar kati ashiba agi, "Tetsür team ajunga Covid-19 vaccine mezüng dose agiogo. Parnok rongnung asayar timbaka pei pei talidak agiogo, kasa mapang iba vaccine magii alir asayar kar Brehostibarnü mezüng dose agiadokogo."

BCCI sangdong ajanga angazükba agi, asayar (tetsür cricket team) timbaka Covishield vaccine agiogo aser

parnok nem UK health department ajanga tanabuba dose agütsütsü.

Brehostibarnü, All-rounder Deepti Sharma-i Twitter sabang ajanga la vaccine agiba noksa ka lemsatepa liasü.

"Ajem angudang terabosa tsübuua aityongjia, tanü ni vaccine agiogo. Akok nungbo takaraba nung vaccine agiadoktsü asoshi nübur dang mepishir! #GotTheDose #We4Vaccine #CovidVaccine," ta lai lemsatep.

India tetsür squad den tebur squad külemi June 02, 2021 nü chartered flight ka nung UK-i aotsü.

Skipper - Virat Kohli, Mohammed Shami, Ajinkya Rahane, Cheteshwar Pujara, Umesh Yadav, Ishant Sharma, Jasprit Bumrah aser Rishabh Pant nung densema India tebur team züngsemtem India kübok centre balala nung

Covid-19 vaccine mezüng dose agiogo. Asayartemi Covishield indang tanabuba dose ya UK nung agitsü imlar.

Tokyo Olympics matongdang India aser South Asia team tem vaccine agitsü: IOC

Tokyo, Monupii/May 28, 2021 (Agencies): India aser kidanger Asia linük pungo nungi Olympic nung shilem agitsüpur tem Tokyo Olympics matongdang vaccine agiadoktsü, ta Hokolbarnü asayamung ayongertemi metetdaktsü.

Iba asayamung nung coronavirus tashidak proktsü/ menateptsü lendong aketba dak sendakba nung tebilemstü adokba ajanga IOC-i iba mera agir alitsü.

Iba mapatong nung, India, Pakistan, Bangladesh, Sri Lanka, Maldives aser Nepal dena lir, ta Tokyo 2020 aser International Olympic Committee-i ashi.

'Indian variant' virus dak sendakba nung tebilemstü adokba ajanga, tang linük trok ya Japan arrtsü adena aitsü

asoshi tenokdangba tesashi agütsü lir.

IOC-i ashiba agi, ozüng agi melaba ama linük trok nungi national Olympic committee temi iba Games nung shilem agitsüpur züngsemtem Test ana dak alaka, Japan-i aotsü ghonda 96 lia Test talila agitsü asoshi bangjemtepogo.

Ajisüaka, talila tendangba maparen dak sendakba nung osang tejangja magütsü.

Shilem agitsüpur (athlete tem) dak alaka, item linük trok nungi arur media aser tanga nübutem Japan-i arutsü atema vaccine agitsü/magitsü indang nung Tokyo 2020 achaayangertemi telangzüba magütsü. Ajisüaka, iba maparen atema asayamung achaayangertemi sorkar den jembitepdar.

IOC-i ashiba agi, iba

Games mapang Olympic village nung athlete aser staff shilem 80 tashi amungtsü aser Japan tonga aruba mapang parnok ajak nem vaccine agütsütsü imlar.

Sentong balala yangluaka, taküm tsüklawa mongpu mapang Japan nung iba asayamung mayongzüksü asoshi nüburtemi kanga sashia nokdakdar, kong Japan nung nübur shilem timba kati iba asayamung anogo atsülangtsü mesüra thitemtsü asoshi telengzüba agütsüo.

Tang, Japan nung pezübuva coronavirus (fourth wave) anema raradar aser iba Games atongtsü ita ka dang lia, tensa mejungi küma aoba asadangteta Sorkari June 20, 2021 tashi Tokyo aser tanga tesemtem nung 'state of emergency' sangdongogo.

Cillessen dak COVID-19 putet



Hague, Monupii/May 28, 2021 (Agencies):

Netherlands football team indang goalkeeper, Jasper Cillessen dak coronavirus tashidak tejangja putetba sülen, pre-European Championship training camp atema külem national team pur den pa Portugal-i motettsüsa akümer, ta Hokolbarnü Dutch soccer association-i sangdong ka ajanga metetdaktsü.

National team nung asayaba den Valencia club indang goalkeeper, Jasper dak iba wara temaitsü agi shirangba mali (symptom-free) aser medical staff temi pa anepaludar.

"Jasper iba tashidak nungi taneptsü nguli dang, pai külem team pur den pre-European Championship training camp nung adentsü," ta Dutch soccer tentet ajanga metetdaktsü.

June 02, 2021 nü Scotland den friendly match ka densema training camp atema, Honibarnü (29.05.2021) Frank de Boer-i par squad (Netherlands National football team) anir Lagos, Portugal-i aotsü sentong lir.

Euro 2020 campaign tenzüka, Group C game telemsa nung Netherlands puri June 13, 2021 nü Amsterdam kübok Ukraine team den asayatsü terenemba lir.

Bayern Munich-i Defender Omar alizükogo

Monupii/May 28, 2021 (Agencies): German champions Bayern Munich-i Brehostibarnü England youth international Omar Richards den 2025 küm tashi küm pezü atema tenangzüktepba ka yangluogo. Omar ya English Championship club Reading nungi free transfer nung Bayern den oa adentsü.

Bayern Munich-i taküm agi küm tekububa atonga Bundesliga kokogo, saka season tembangba sülen defender Jerome Boateng, David Alaba

aser Javi Martinez nungeri club toktsür aotsü telemetba agiogo.

"Bayern nung oa adenba ya kü atema tetushi ulura. Nükjidong ka atalokogo. Alima nung club tulutiba rongnung ka indang tola asemstü atema nema danga bilemer. Ni tarutsü nung team maneni takok nung aotsü atema teyari agütsütettsü imlaa atar," ta Richards-ashi.

Bayern-i, RB Leipzig nungi central defender Dayot Upamecano alizükatokogo aser arishi küm 23 tain Richards ya defence nung tabelen-len

asayatsü atema option ka asütsü.

"Pa Bayern nung adenba atema onok kanga pelar. Omar ya leftback position nung asayar kanga tajung ka lir," ta Bayern sports director Hasan Salihamidzic-ashi.

"Pai forward ama asayatsü lenmang yanglur aser asaya nung rangloker asayar. Pai onok team nung shilem tajung ka agitsü ta temulunglema bilemer," ta paisa ashi.

Bundesliga season tasenba August ita tenzüksü.

BILEMDANGANG

"Angi tajungibo ozüsangnu ajak aputsü akoker."